

Caya Gilberto Francois (Betico) Croes inaugura na Republica Dominicana, Sto. Domingo

Ariba invitacion di Lic. Domingo Batista, Civico (Alcalde) di Ayuntamiento di Santo Domingo Este, Santo Domingo, un delegacion a viaha for di Aruba pa e ciudad capital aki, un amplio delegacion encabeza pa Minister di Husticia, sr. Rudy Croes, familiaran di nos Libertador, ademas di otro invitadonan, pa atende un acto oficial di designacion di un caya na nomber di nos Libertador Gilberto François (Betico) Croes. Na yegada di e delegacion na Republica Dominicana nan a keda ricibi pa un comision forma pa alto representante nan di Gobierno Dominicano, kendenan a prepara un programa hopi extenso y interesante. Ariba e programa oficial tabata tin bishita na sede di PRD (Partido Revolucionario Dominicano) cu ta pasando de

un impresionante remodelacion na unda cu e delegacion a haya un recorrido. PRD actualmente ta e partido mas importante den e pais den cual nan ta conta cu mayoria absoluto den Camara Senatorial, Diputado y Ayuntamiento. E partido aki ademas ta gozando di un apoyo masal di e pueblo Dominicano.

Tambe ariba programa tabata tin e bishita cerca e presidente di e partido Dr. Ramon Alburquerque, un persona cu un gran carisma, sencillez y cu un amplio comocimiento y cu un inteligencia y preparacion bararo. Segun tur pronostico den e proximo eleccion na 2008 dr. Alburquerque lo

keda eligi como e proximo presidente di e pais aki. Tambe e delegacion tabata tin e oportunidad pa haci un bishita ariba nan peticion na sede di e partido PDC Dominicano. Aki e delegacion a ser ricibi pa su presidente y secretario general. Durante e encuentro aki un amplio presentacion a keda

haci di e partido aki pa loke ta nan ideologia politico, vision y mision. despues di e encuentro aki a keda yama un conferencia di prensa den mes un sede aki cu por cierto a goza di un bon presencia di parti e reportero nan Dominicano. Ariba e gran dia 19 di Januari 2006 e designacion di e caya a tuma

lugar. Prome cu e acto oficial, a tuna lugar un entrega floral na tumba di e gran estadista Dominicano y un gran amigo di nos Libertador Betico Croes. E acto a conta cu presencia di alto mandatario di gobierno Dominicano ademas di un gran multitud. E ofrenda floral a keda haci pa

sr. Rudy Croes, Joe Koolman y Leoncio Croes. Despues tur presente a bay na lugar na unda cu e acto oficial pa e designacion di e caya 20 di ensanche Alma Rosa pa nos Libertador Gilberto François (Betico) Croes. E caya ta conta cu un distancia

di 2.7 km y tin 26 cuadra. E caya aki ta cruza e ensanche Alma Rosa cu ta un di e barrio residencial mas prominente di e ciudad cu ta conta cu un clase social halto y medio halto. Aki tambe tin un espacio reserva pa construccion di un parke cu lo hiba tambe nomber di

nos libertador betico Croes. Durante e ceremonia oficial aki a hiba palabra profesor Rafael Santos, Sindico Domingo Batista, dr. Carlos Garo, dr. Ramon Alburquerque y sr. Rudy Croes.

Nos por mira atras ariba un acto hopi impresionante y bunita cu a tuma lugar especialmente ora cu bo himno ta resona banda di himno di paisnan grandi manera ta e caso aki y ariba tur cos e gran vision cu nos libertador tabata tin cu awe Aruba por tin su himno propio, ademas di por a presencia e caya aki na nomber di nos libertador cu ta yena nos cu orguyo.

